

ati schismatis reatum, inconsideratum Zelum, inordinatas disputationes, malignas artes, & quicquid denique atrabilis suggerit, exprobrat. His enim velut initiis & lenociniis verborum tam pulchrum rei auspiciam facere voluit: *Qui causas schismatis inter Ecclesias Protestantes suscepti & continuati veras contemplabitur, videbit illud initio ab inconsiderato Zelo & inordinatis disputationibus exortum esse, & jam ad hunc usque diem continuari malignis quorundam artibus, quae probrosis scriptis & tribunitijs concionibus foventur, ut publica odia & factionum studia vulgi animis sub praetextu Religionis insinuentur.* Nobis, inquam, probrosa scripta, tribunitias conciones, inconsideratum Zelum & malignas artes impropere, quibus schisma in hunc usque diem fovere & continuare malimus. Quos enim alios hic perstringat, nescio: certe se & socios suos tanti criminis reos coram Deo & Angelis ipsius totoque adeo mundo non pronuntiabit. Quicumque ergo placita ejus, quam falsa etiam, putida & inepta fuerint, non exosculatur, is reum se constituit schismatis suscepti & in hunc usque diem continuati. Quod quidem quo loco habendum sit, facile liquet. Certè indignus est, cui disputatio committatur, praesertim in rebus Theologicis, cui pro argumento ad manum convitium est, neque refutasse se adversarium opinatur, nisi insigniter ei maledixerit.

xcvi. Quicumque autem ille sit, qui vel faces primum admoverit certamini, vel fomenta adhuc suppeditet, satis fuerit, ipsum causae momentum ingredi, & quid de Dn. Duræi conatibus, & recens excoGITATIS COMMENTIS statuendum sit, explicare, & videre adeo, an desiderio tum meo, tum aliorum satisfecerit, & evidenter satis ostenderit, utrosque, Lutheranos nempe & Calvinianos, idem fidei fundamentam tenere. Tria verò sibi perpendenda esse in illa *Disquisitione* sua praefatur: *Primum, quid per Fundamentalium dogmata, de quibus inquiritur, sit intelligendum? II, Quenam sint illa fundamentalia, id est, ubi illa certò inveniri, & quomodo inter Protestantes certis propositionibus exprimi & enumerari queant? III, Quare consensus in fundamentis inter Protestantes liquidissimus concordiam huc usque non potuerit procurari inter illorum Ecclesias?* De quibus ille deinceps pluribus agit, nos verò ordine eum sequemur & simul illud quoque, an & in quibus doctrinae fidei partibus consensus ac dissensus sit, addemus.

SECTIO